


SI KIKOY ANNA I ALIPOPPO

Tadday nga gabi, magayaya si Kikoy nga massinaw ta piggan. Tulwan yayya na tadday nga lampara nga nebesin ta arigi. Nasingan na i tadday nga makkagag nga insekto nga kunna matuggi i paya na ta lampara.

Ari nga nabbabang si Kikoy nga nanggafu ta minafi i ubo na nga insekto. Nepay na yaw ta palag na nga kunna, "Kabbi ka gapa. Natakitakka kari?"



Ammu na lagapa ngana i tabbag na yari minafi i ubo na nga insekto anna kuminagag nga minarayyu.

Kommanan na, nepakoli ni Kikoy ta kakkofun na i nasingan na. Ariyadda kurugan tu egga i insekto nga umafi i ubo na.

Maraddam yayya nga nallabbe megafu ta ariyadda yayya kurugan.

Ta otu uli gabi, nassinaw mangngana yayya ta piggan. Ininnaggan na nga masingan na mangngana yuri insekto nga umafi i ubo na. Nabalina ngana nga sininnawan ngamin i piggan, kalderu, parayu, basu, kutyara anna tinidor ira. Ngem ariyanna paga nasingan i pakeennaggan



na nga insekto.

Mittan nga aggaw, nappasyar da nga makkorofun ta kakaddotan. Mattakuwel ira ta kalamagi anna nabbarag ira ta manga. Ari ira molang nga maddinnaraddag.

Ariyadda natageno tu gabi gabba ngana. Ariyadda ngana masingan i lakaradda nga mallubbe. Maggudugudu ira anna maganassing da ta naribbo ngana.

Gangngana laman neripa ra ira i baddi nga afi nga kumagakagak. Pakasingan ni Kikoy taw, nakulle yayya. “Kakkofun, azzuri yuri napakoli nikamu nga insekto.”

Nage na paga nga naguvovug i kakkofun ni Kikoy nakaranni ngana nira i babaddi nga afi. Mas lallagu nappabbaw da turi ta naguvovug yaw.

“Meddu nga kakkofun, neripa ta kamu ta kayu nga jakku. Anni awayya nga meyuffun nikamu? Kunna egga mabba i problema nu.”

“Naribbo ngana garay. Ariyammi ngana masingan i lakaram mi nga lubbe ta gibbalayam mi,” kunni Kikoy nga mattangi.

Nanaw i insekto nga awan tu kinagi.

Ari nabbayag, nakaddag i abbing ira ta nasingadda. Napakaru nga afi i kumagakagag ta langi nga umara-aranni nira.



Minaranni i kadakallan anna kanawagan ta afi. Yari yuri i insekto nga inuffunan na turi.

“Meddu nga Kikoy nga kofukku, navulawanan i affutu futuam mu. Yatun tu uffunattakamu sangaw. Tuluwammi sikamu ta allabbe nu.”

Nappayag i abbing ira nga nakalabbe. Nage nattallung ni Kikoy ta balay da, kinovovug na i insekto. “Meddu nga kofun, awayya na kari tu mammuwakku i ngagam mu? Ikaya ku i mappabalo nikaw ta mapiya. Ikaya ku nakuwan gapa tu meggo i pakkofutta.” “Alipoppo, meddu nga kofun,” tabbag na insekto.

“Diyos I mabbalo nikaw kofukku nga Alipoppo ta nepangnguffum mu nikami. Sakan gapa si Kikoy,” magayaya nga pakiam-ammu ni Kikoy ta baggi na.

“Yuri gapa i ariyammu makapabalo, kofuk ku nga Kikoy? Adde sonu uli nga assimmu ta,” tabbag ni Alipoppo.

